

JEMS

¹ Wun Jems wun. Godna njivwa kwutiga nyan wun. Nina njambwi nyan Jisas Kraistna njivwa kwutiga nyan wun. Kan pas wunayi piliwutiga. Isrelna tamba vili kiyeli vililik yelangi nimba kat kan pas piliwutaa kwigowun. Ngwuk ngwula ngepma kwagalalaa yiga ngepma ngep-mamba yetiligangwuk. Ngwuk kat apma nandinya wowun.

NIMA VAK YANDEYAN NIN KAT AVA KWIGIYANDI

² Wuna mbaapma nimba, mandip mandip nima vak gwuk kat yandeyan solat sigiyangwuk. Ngwula mbandi ke vali yinda. ³ Nima vak yandi, God kat yelavika tingweya vak kwagala lapman yingweyan apma maawut tigiyanwuk. Tamba viga ligangwuk. Ngi kat tiga nima vat yandeyan solat asi ngwula. ⁴ Tagula maawut yelavika tingweyan apma vak tigiyanwuk. Apma vat tiga apma nda kat ana kwak kiyangwuk. Apma nda aywaa klanin waa yelavika ligiyangwuk.

KAVLE MAAWUTNO LIGA NYAN GOD NDI KAT APMA MAAWUT KWIGIYANDI

⁵ Ngwula nat nyan apma maawut yelavik tapman tindeyan God kat wagala kiyadi. Wagalandi maa God ndi kat apma maawut kwigiyandi. God ndinyangu kat nima sakwat apma nda kwiligandi. Wun kat manda kat wagalamin waa ana waigandi God. Kwo kwigiyandi. Tamba wagala lindi, wuka ligandi. ⁶ God kat wagalangweya njimbla nin kat kwigiyandi? O. Ana kwigiyandi waa ke yelavikngwa. Maawut vililik yelavika liga nyan mwuk kwutindi liga pali vla ligandi. ⁷⁻⁸ Maawut vililik yelavika tiga nyan simblan njivwa kwuk kiyandi. Ngi vat tigiya

nyan njambwi nyana nda ana klaigandi. Ndi klaigandi waa ke yelavikngwa.

SANYA LAPMAN TIGA NIMBA SANYA TIGA NIMBA

⁹ Nina mbaapma nyan sanyu lapman tindeyan ana yelavika tigiyan. Ngini God wun kat kwutaa wuna si katso kiyandi waa yelavika liga solat sigiyandi. ¹⁰ Nima sanya tigiya nina mbaapma nyan ana ndina nima sanya kat solat sigiyandi. Yuwi mwe kavle yiliga vak vla ndino tiga liga kavle yigiyandi. Ndina kwanda kwanda nda ngilindi maa yelavik kiyandi. God wandi maa ngilindi waa yelavika solat siga ligiyandi. ¹¹ Nya niman silindi, yuwi liga wuligandi. Mwe nimbun liga wuga nda ligandi. Ndandi mala mwena apma mbangi kavel yigiyandi. Nima sakwat sanyo tigiya nimba ndina sanya kat mina yelavika njivwa kwuka liga ndino kavle yigiyandi.

GOD NIN KAT KAVLE VAT AY NGWULA WAA ANA WANDI

¹² Kavle vak aygwula waa wanda vak ngwuk kat yandeyan nima maawut ke yelavikngwa. Wan vak kat kwulakngweyan God ngwuk kat apma wenga kwigiyandi. Tak God wandi. Wun kat yelavika ligiya nimba ngwuk kat nima wenga kwigiyowun waa tak God wandi. Kan wenga ndinamba klalaa njimbla njimbla apma vat tigiyan gwuk. ¹³ Kavle vat ayngwula waa wanda vat yandeyan God wun kat kavle vat ay waligandi waa ke wangwa. God wupma ana waligandi. Kavle vat ay ngwula waa wanda vak ndi ana wuka ligandi. ¹⁴ Kavle vat ay ngwula waa walinja nda nina kavle maawutna yelavitina. Nina kavle maawut yelavitina vapmba kavle vat yiliganin. ¹⁵ Kavle maawutna nyaangit wuka lineyankavle njivwa kwuk kiyandin. Kavle njivwa mina kwuka lineyankavle vat yigiyandin.

¹⁶ Wuna mbaapma nimba, ngwuk kat woseka ana wowun. Wupma yineyan kavle vat yigiyandin. Yelavik ngwula. ¹⁷ Nina nyinangwupmba liga nyaek nin kat

apma vak mina yiligandi. Kavle vak kai. Ndi njimbla njimbla tiliga ya vitiga lam vla ligandi. Nyinangwupmba liliga singwut kuntndan ndi kat kwulataa angwa ya vla vitigandi. Ndi mandip nin kat ana viligandi. Apma vat mina viligandi. ¹⁸ God ndina maawupmba yelavita n nin kat ndina apma nyaangit mbutindi. Ndina nyaangit wutaa ndina mbaapmamba wuleinin. Nin tak wuleiya nimba nin. Ngini nat nima sakwat nimba wulei kiyandi. ¹⁹ Wuna mbaapma nimba, ngwuk kat nima vak yelavika ligowun. Kita nda kat vingwangat wawun. Awuk ngwula. Nat nimbana nyaangit awuk ngwula. Ndi kat wata wangweya. Kwo nda liga awuk ngwula. Kwo ndi kat ke walea lingweya. ²⁰ Ndi kat walea lingweyan ndina kavle vat kwagalalaa Godna apma vapmba ana tigiyan di. Walea lingwa nyaangit Godna angwa vat ana visimogwi kiyandi. Ngi kat tiga walea lingwa nyaangit ana wuka ligiyandi. ²¹ Wan kavle vat kwagala ngwula. Godna nyaangit mina awuk ngwula. Nin kavle nimba nin. Godna nyaangit nin kat kwunak kiyandi waa yelavika awuk ngwula. Wukngweyan Godna nyaangit ngwutna maawupmba yelavika liga apma maawut mina tigiyan gwuk. Ngini njimbla njimbla apma vat tigiyan gwuk.

²² Godna nyaangit kwo wana wuka kwagala lingweya. Godna nyaangit wutaa liga wanda njivwa kwutaa ali ngwula. ²³ Kita nyan Godna nyaangit kwo wutaa kwagalandeyan glasmba mindama viga liga nyan vla tigandi. ²⁴ Mindama vilaa kwagalalaa yilaa mindama tinda vak ana yelavika tigandi. Maawut tamba tivindi maa mindamamba la nglambi ana njangi kiyandi. ²⁵ Kita nyan Godna nyaangit wutaa God wanda njivwa kwuka lindeyan God ndi kat apma vat yigiyandi. God waa nyaangit apma nyaangitna. Nima sakwat njambiya tiga nyaangit ana ndi. Kita nyan wutaa kwutaa lindeya ndi kat ngilaa la kavle vat

njalatndi maa kwo ligiyandi.

²⁶ Kita nyan wun Godna vapmba yiga yetiligowun waa walaa nima sakwat kavle nyaangit ngambundeyan ndi woseka waliga nyana. Ndi Godna vapmba simblan yeti ligandi. Kavle maawut tiga nyana. ²⁷ Nina nyaek God apma vat yiga yetinangat wandi. Nin kat kupma wandi. Kwo yetigiya tolagwa nyaek nyime tapman tiga mat nyangu kat kwunak kiyangwuk waa God wandi. Kan kipmana kavle vak ke yiga yetingwa waa God wandi.

2

NDINYANGU AYWAA NDI KAT KITA VAPMBA YIGAT

¹ Wuna mbaapma nimba, nina apma njambwi nyan Jisas Kraist kat ndi kat maawupmba yelavika ligangwuk. Nguk nat nyan kat nat vapmba yetiga nat nyan kat nat vapmba yetingweyan kavle vatna. Jisas Kraist waa apma vak ana ndi. ²⁻³ Godna nyaangit wupmak yisolaa tingwa njimbla sanyo tiga nyan yandeyan ndina apma waavwi yelaga nda vilaa min apma tikitmba ndali mila waa ke wangwa. Kavle waavwi tigiya nyan yandeyan min kwo laataa tigiya min. Wuna man kavamba ngay yapmba nda ligiyamin waa ke wangwa. ⁴ Mbik kat wupma wangweyan kavle vatna. Mbila mbangi mina vilaa nat nyan apma nyana nat nyan kavle nyana waa yelavika wana tingweyan. ⁵ Wuna mbaapma nimba, God wupma ana yelavika ligandi. Kan kipmana sanya lapman tiga nimba God ndi kat kwutaa ndina mbaapmamba taagandi. Ndi kat apma maawut kwindi. Tak God wandi. Wun kat yelavika liga nimba ndi kat apma wenga nda kwilaa ndi kat viga ligiyowun waa wandi. Ndino ndi kat kwigiyandi. ⁶ God ndina si kwutaa katsondi. Ngwuk ndina si kwutaa manda kat viyesandangwuk. Sanya liga nimba ndina si kwutaa manda kat katso ligangwuk. Ndi ngwuk kat apma

vak ana yiligandi. Ngwuk kat kotmak kali ligandi. ⁷ Ndi sanyo liga nimba Godna si kwutaa viyesanda ligandi. Ndi kavle nyan ana ndi. Ndina si manda kat kwutaa viyesanda ligandi. Ndi God ngwuk kat apma vat yindi. Ngwuk kat kwutaa ndina mbaapmamba taagandi.

⁸ God waa angwa nyaangit lavu nyingamba tamba piliwutndi. Avla ngwula kwunatingwa vak nat nimba kat wupma kwunak kiyangwuk waa tamba piliwutndi. Wan nyaangit wutaa liga yeti ngwula. Wutaa yetingweyan apma vat yetigiyangwuk. ⁹ Nat nyan kat nat vapmba yiga nat nyan kat nat vapmba yilingweyan kavle vatna yilingwa. God waa nyaangit kat kaiwalaa kavle vapmba yilingangwuk. ¹⁰ Kita nyan God waa nyaangit aywaa wutaa liga kita nyaangit mina wupmak kat kai wandi. Nat nyan God waa nyaangit aywaa wupmak kat kai wandi. Vililik pali kita vapmba tigambik. God waa nyaangit wupmak kat kai wambik. ¹¹ Tamba God wandi. Yambisik yilinja vak ke yingwa. Nat nimba kat ke vatnyangwa waa tamba wandi. Yambisik yilinja vak yilapman tiga nat nyan kat vatnyangweyan God waliga nyaangit wupmak kat kai waa tiga nimba vla ligangwuk. ¹²⁻¹³ Ngwuk yelavik ngwula. Ngini yaiga nandinya God nin kat vilaa siga naguga tigiyaandi. Yilina vak kat vilaa liga God yelavik kiyandi. Nat nimba kat miwa yiga liga nimba ndi kat miwa yiga liga ana ndi kat sigiyowun waa yelavik kiyandi God. Ngi kat tiga nat nimba kat miwa ay ngwula. Wupma yilingwa vak yilingweyan God ngwula kavle vak vilaa liga ngwuk kat aa sigiyaandi.

GOD KAT MAAWUPMBA YELAVIKA LIGA APMA NJIVWA AKWUK

¹⁴ Wuna mbaapma nimba, kita nyan laataa wun God kat wuna maawupmba yelavika ligowun waa walaa apma njivwa kwutapman yindeyan kavle vatna.

Maawupmba yelavika tinda vak ndi kat ana kwunak kiyandi. ¹⁵ Ngwutna kita mbaapmana ndu lakwa waavwi kiginda lapman tiga ngwuk kat yalaa waganjeyan ngwuk angamak yigiyangwuk. ¹⁶ Ndi kat kwi lapman kwo apma vat ay ngwula. Ngwutna mbangi apma vat tigiyan di. Ngwutna yat taak kiyandi waa kwo wangweyan di apma vat tigiyan di? Kai la. Apma vat ana tigiyan di. Kavle vat tigiyan di. ¹⁷ God kat maawupmba yelavika tingwa vak kita vatna. Maawupmba mina yelavika apma njivwa kwutapman yingweyan nat nyan kat ana kwunak kiyangwuk. Avla ngwutna maawut ana kwunak kiyangwuk.

¹⁸⁻¹⁹ Nat nyan laataa wandi. Min waligamin. God kat maawupmba mina yelavika ligowun waa waligamin. Maawupmba yelavitima vak wuna minimba ana viga ligowun. Anda vapmba vigiyowu. Wun apma njivwa kwutigowun. Kwutuwa apma njivwa vilaa God kat maawupmba yelavika tuwa vak vigiyamin vak nima vak ana ndi. God kita ligandi waa maawupmba yelavika tingwa vat apma vatna. Setena mbaapmamba nimba ndino wupma maawupmba yelavika tigandi. Yelavika liga God kat vaaka liga ndina ava pla ligandi. ²⁰ Mbutwa nyaangit ngwuk ana yelavika ligangwuk. Apma njivwa kwut tapman tiga God kat maawupmba mina yelavika lingwa vak apma vak ana ndi. Kwo vatnat. Tamba la nimba ya vak ngwuk kat mbukiyowun. Wutaa wuna nyaangit yelavika ligiyangwuk. ²¹ Nina tamba la walanga Ebrahim God kat kwivat ndina nyan Isak kat vatnyavat tindi. Apma njivwa kwutndi mala God ndi kat vilaa apma nyan min wandi. ²² Ndina maawupmba God kat yelavika liga God waa njivwa kwutndi. Kwo maawut mina ana yelavika lindi. Yelavika liga apma njivwa kwutndi. ²³⁻²⁴ Tamba la nimba piliwukna vak vla Ebrahim ndino

wupma yindi. kupma piliwutndi. Ebrahim God kat maawupmba yelavika tindi maa God ndi kat vilaa min apma nyan min waa wandi waa tamba piliwutndi. God Ebrahim kat wandi. Min wuna ali nyan min waa ana wandi. Ndina maawut tiga vat ndina apma njivwa vilaa ndi kat min apma nyan min waa wandi God. ²⁵ Tamba la yambisik yila taakwa Rehep lilo wupma yilili. Josua ay wanda nimba lila ngay wuleindi mala ndi kat pakwuli. Pakwulaa yinjeya yambi visimokwili. Ndi kat apma vat yilangat ngini God wandi maa li kat ana sindi. Kwo lili. ²⁶ Kita nyana wudumbu yindeyan ndina mbangi kiya nyan vla ligiyandi. Ndina mbangi wudumbu lapman tindeyan kiyaigandi. God kat maawupmba yelavitina vak kita vatna. Apma njivwa kwutapman tiga God kat maawupmba yelavitneya vak kiya vak vla ligandi.

3

KAVLE NYAANGIT NGAMBULANIN

¹ Wuna mbaapma nimba, ngwuk nat nimba kat simogwingweya njivwa klavat wana wagalangweya. Ngini yaiga nandinya God ndinayngu kat vilaa siga nagu kiyandi. Wan njimbla nat nimba kat simogwi liga nimba kat vilaa nima vak ndi kat siga nagu kiyandi. ² Nin aywaa nat njimbla kavle vat yiliganin. Kita nyan nat njimbla kavle nyaangit ngambu lapman yindeyan ndi apma nglei nyana. Kavle nyaangit ngambu lapman tiga nyan ndina mbangi waiga kwundi ana wuka ligiyandi. Ndina mbangi ndi kat ana kwulak kiyandi. ³ Hosnana ngaanga vapmba mat ain taagalaa way way yaaw ngilaa nagangi taamba kwutaa ndina nambu kwutaa katendi. Nambu kwutaa katenja kava kos wupma yiligandi. ⁴ Nyingi ngu yiliga nima njambit ndino wupma yiligandi. Nima mwuk kwutiga njimbla mwupmba sel kwutaa kali

ligandi. Ndina kengwi njaambitmba liga ngusa nima nda ana ndi. Ngusamba njaambit vagala lindi maa nima njaambit yiligandi yelavitnja kavat. ⁵ Ngambulina mat nyaangit wupma ligandi. Mat nyaangit ngambu linin maa wan nyaangit nima njivwa kwutigandi. Mat nyaangit ya vla ligandi. Mat ya wimba sagalandi maa yiga nima vika tigandi. ⁶ Kavle nyaangit ya vla ligandi. Ya mat tiga yiga vika niman yiligandi. Kavle nyaangit wupma ligandi. Kavle nyaangit ngambulindi, mbutseli mbutsela yiga nima yiligandi. Ndina kavle vak niman yindi maa ya vitiga kavamba tiga kavle vak vla ligiyandi. ⁷ Kwapi nda, waavi, ngumba yetiliga nda wan nda aywaa ndu nyana kwundi wuka ligandi. Wan nda kat aywaa ndu nyan viga ligandi. ⁸ Kita nda kat mina ndinyangu ana viga ligandi. Wan nda kavle nyaangitna. Kavle nyaangit kat ana alisiga ndu nyan kemak kiyandi. Wan kavle nda avla wogweligandi. Ndu nyan valiliga kavle kamboy vla tigandi. ⁹ Nin mandip mandipnyaangit ngambu liganin. Nat nyan kwundimba nina njambwi nyaek Godna si kwutaa katsolaa ndu nyana si kwutaa viyesanda kiyandi. Tamba God ta vak vla nin kat kwutndi. Manda kat nat nimbana si kwutaa viyesanda kiyandin. Wan vak ana nglaatndi. Kavle vatna. ¹⁰ Kita nyan tak apma nyaangit ngambulaa ngini kavle nyaangit njika ngambu ligandi. Wuna mbaapma nimba, wan vak kai. Ana nglaatndi. Kavle vatna. ¹¹ Waangumba woke liga ngu wupma ana woke ligandi. Apma ngukavle ngu kita waangumba ana woke ligandi. ¹² Wuna mbaapma nimba, mi sik wupma ana waat tigandi. Oliv walinja mi sik fik walinja mimba ana waat tigandi. Fik walinja minana si diwai wain walinja ndamba ana waat tigandi. Kavle nyingi ngu avla kigin ngu ana tigiyanidi.

GOD NIN KAT APMA MAAWUT KWIGIYANDI

¹³ Ngwutna kita nyan apma maawut yelavika lindeyan apma vat ndi yiga yeti kiyandi. Yiga yetinda apma vak vigiyangwuk. Wun apma nyan wun waa ana waigandi. Kwo apma vak yeti kiyandi. ¹⁴ Ngwutna nat nimba kat tipmwi kwula yiga ligandi. Nat nimba kat kwulapmak yelavika ligandi. Wan vak ana nglaatndi. Wan vapmba yelavika lingweyan apma maawut sika tiganin waa ke wangwa. Apma maawut ana sika ligangwuk. ¹⁵ Kan kavle maawut God kwiyan ana ndi. Kan kipmana maawutna. Kan kavle maawut Godna vak kat ana yelavikandi. Setena vak kat mina yelavika tigandi. ¹⁶ Nat nimba kat tipmwi kwula yiga ndi kat kwulapmat yelavika lingweyan nima sakwat kavle vat ngwulamba tigiyan. Kavle savle yiga yeti kiyangwuk. ¹⁷ God kwiya maawut wupma ana ligandi. God kwiya maawupmba yelavika liga nimba kupma yiligandi. Apma vat mina yiligandi. Kao yilinja vak kat kai waligandi. Nat nimba kat yigumba apma vak yiligandi. Nat nimbana nyaangit wuka ligandi. Nat nimba kat miwa yiga ligandi. Apma njivwa kwut tigandi. Tagula maawutno tigandi. Mandip mandip ana yiligandi. ¹⁸ Apma maawut yelavika liga nyan walea linja vak kat ndinayi kai waliga. Nat nimba awat sowat walea linja vak kwunak kiyandi. Wupma yindeyan nat nimba ndi kat vilaa min apma nyan min waa walea kavle vat kwagalalaa apma vat yiga yeti kiyandi.

4

KAN KIPMANA VAK KAT WOVYAGUGA LIGA NYAN GOD KAT MAAMA NYAN VLA LIGANDI

¹ Ngwutna mbangi waliga kwundi awat sowat walea lingwa vatna angwa nda. ² Nat nimbana nda klavak kat nimbana yelavika ligangwuk. Wan nda klavak kat nat nimba kat vatnya ligangwuk. Nat nimbana nda klavak

kat ndi kat kao yiligangwuk. God kat wagalangweyan kwilinda apma nda klaigangwuk. ³ Nat njimbla God kat wagalangwuk maa ana kwindi. Avla ngwutna mhangi kat mina kwunapmak wagalangwuk. Wungi kat tiga God ana kwindi. ⁴ Ngwuk God kat kwagalalaa mandip mandip yelavika ligangwuk. Kipmana nda kat klavak yelavika lingwa vak kat God kai waligandi. Kipmana nda kat mina klavak yelavika tingweyan Godna maama nimba vla tigiayangwuk. ⁵ Tamba la nyan Godna nyaangit lavu nyingamba kupma piliwutndi. God ndina waagan nin kat kwindi, yaa tavindi. God kwiya waagan kat kai wangweyan God gwukkat kai waigandi waa tamba piliwutndi. Woseka waa ana piliwutndi. Ngwuk yelavik ngwula.

⁶ God ngwuk kat kwunatndi waa wan kavle vat ana kwulak kiyandi. Nat tamba la nyan Godna nyaangit tamba piliwutndi. Wun apma nyan wun waa waliga nyan God ndi kat kai waligandi. Wun apma nyan wun waa waliga nyan God ndi kat kai waligandi. Wun kavle nyan wun waa waliga nyan God ndi kat kwunak kiyandi waa piliwutndi. Ngiyambak piliwutndi, kwunak kiyandi. ⁷ Godna nyaangit wuka ndina kwupmba ay ngwula. Seten kat kaiwangweyan ngwukkat kwagalalaa vaaka yigiyandi. ⁸ Godna gwaymba yaa ndina nyaangit wuka tingweyan ngwuk kat ngwaymba yaa kwunak kiyandi. Kwutingwa kavle njivwa kwagala ngwula. Yelavitingwa kavle maawut kwagala ngwula. Maawut vililik yelavitingwa vak kwagala ngwula. ⁹ Tak kavle vat yingwa vak kat yelavika solat sigiyangwuk. Solat silingwa vak kwagalalaa nglai-gangwuk. Apma nimba nin waa yelavitingwa vak kwagalalaa kavle nimba nin waa yelavik kiyangwuk. ¹⁰ Nin kavle nimba nin waa njambwi nyan kat wangweya ngwuk kat wutaa ngwutna si kwutaa katso kiyandi.

NAT NIMBA KAT KAVLE NYAANGIT KE WANGWA

¹¹ Wuna mbaapma nimba, ngwuk awat sowat kavle nyaangit ke wangwa. Ngwutna kita mbaapma nimba kat kai waa kavle nyaangit ngambungweyan God kwiya nyaangit kat kai waliga nimba vla ligiyangwuk. God kwiya nyaangit kat kai wangweyanwan nyaangitmba ana yeti kiyangwuk. Ndi kat kai waligan nimba vla li kiyangwuk. ¹² God ndina nyaangit tamba kwindi nin kat. Nin kat siga nagulaa ndi apma nyana ndi kavle nyana waa waligandi. Ngwuk nat nimba kat siga naguga ndi apma nyana ndi kavle nyana waa ke wangwa. Ngwutna njivwa ana ndi. Godna njivwa. Ndi ndinyangu kat siga nagulaa apma nimba kat apma vat yi kiyandi. Kavle nimba kat si kiyandi.

GOD NIMA NYANA. NGWUK MAT NYANGU NGWUK

¹³ Ngutna nat nimba kupma wa ligangwuk. Mbambala o kinya laataa nat ngepma vilaa ndimwe kita liga nima njivwa kwuka nima sakwat sanya klaiganin waa wa ligangwuk. Wangwa vak ana nglaatndi. ¹⁴ Ngini yaiga vak ana viga ligangwuk. Kwo li kiyangwuk? Wundumbu yi kiyangwuk? Ana viga ligangwuk. Nin ndinyangu yagimbi vla liganin. Yagimbi yiga ngili ligandi. Nima sakwat njimbla ana li ligandi. Nino wupma liganin. ¹⁵ Wa lingwa vak kwagalalaa kupma awa ngwula. Njambwi nyan wandi maa nin kwo liga njivwa kwuk kiyandin. Kai wandeyan wundumbu yi kiyandin waa awa ngwula. ¹⁶ Mbambala wupma ana wa ligangwuk. Njambwi nimba vla liga nina kwondumba njsvwa kwuk kiyandin waa mbambala wa ligangwuk. Njambwi nimba nin wa yelavikngwa vak kavle vatna. ¹⁷ Tak wa lingwa kavle vatna waa ana yelavika lingwuk. Mbambala ngwuk kat wan vak kavle vatna waa wowun, wuka ligangwuk. Tak wangwa vak kwagala lapman tingweyan God ngwuk kat vilaa ndi kavle nimba ndi waa waigandi.

5

NIMA SAKWAT SANYO TIGA NIMBANA NYAANGIT

¹ Ngwuk nima sakwat sanyo liga nimba samat tiga ana solat si kiyangwuk. Samat tiga nima vak yandi maa nglaiangwuk. ² Ngwutna apma nda kavle yi kiyandi. Ngwutna apma waavwi vilingini kindi maa kavle yi kiyandi. ³ Ngwutna gol ngwutna sanya tamba sinkwutndi. Ngutna sinkwuta liga sanyanat nimba vilaa liga waigandi. Ndi manda kat nima sakwat sanya yisolaa taagnadi waa waigandi. Kavle vatna yinja waa wandi maa yisoga taaga lingwa sanya kat vaaka ligiyangwuk. Vitiga ya kat vaaka lingwa vla vaaka tigiayangwuk. ⁴ Tak ngwula ambukat kwuta nimba kat nat sanya mina kwingwuk. Ndina nat sanya ana kwingwuk. Sikwutaa kwutaa lingwa vak God viga ligandi. Ngwutna njivwa kwuta nimba nin kat aywaa ana kwingwuk waa walinja kwundi God wuka ligandi. God ndi kwondu mbundi liga nyana. Ngwuk ana vaaka ligangwuk? ⁵ Kan kipmamba lingwan nima sakwat apma nda nima sakwat sanya kwutaa lingwuk. Klavak yelavka tingwa nda tamba klangwuk. Nima sakwat kwio lindi vatnyanja mbak vla wupma ngwutno nima sakwat kwando kwandona tingwuk God ngwuk kat si kiyandi. ⁶ Apma nimba kat kai walea ndi kat vatnya lingwuk. Ngwuk kat aywaa ana alisiga kwulatndi. Ndi kat kwo vatnyangwuk.

NJAMBWI NYAN YA MINA LIGANDI

⁷ Wuna mbaapma nimba, njambwi nyan ya mina ligandi. Ndi kat kawiga liga ngwuk kat nima vat yilinja vak kat nima maawut ke yelavika lingwa. Ambukat kwutiga nyan kiginda kat kawiga ligandi. Kandi nda tulaa liga meik nya kat kawiga ligandi. ⁸ Ngwutno njambwi nyan kat kawiga ali ngwula. Tagula maawutno yelavika kawiga ali ngwula. Nima nyan ya mina ligandi. Sivla kai.

⁹ Wuna mbaapma nimba, awat sowat ke walea lingwa. Awat sowat walea lingweyan nima nyan ngwuk kat kai waigandi. Tamba ya vla ligandi. Tamba bapmo viyaliga nyan vla ligandi. ¹⁰ Tamba la profet ndi tamba God waa nyaangit mbutindi. Nat nimba ndi kat nima vat yilindi maa ndina maawupmba yelavika linja vak ana kwagalandi. Tamba yinja vak vla ngwuk yelavik ngwula. Yinja vla ngwutno ay ngwula. ¹¹ Tagula mawupmba yelavika linja vak kat kwagala lapman tiga yilinja vak kat yelavita ndi apma nimba ndi waa waliganin. Nat tamba la nyan Jop ndi tamba wupma yilindi. Ndi kat kavle vat yandi maa God kat tagula maawupmba yelavika tinda vak ana kwagalandi. Ngi kat tiga God ndi kat kwunatndi. ndi kat yinda vak vilaa God nin kat yilinda vak viga ligangwuk. Nin kat miwa yiga liga apma vat mina yiligandi.

NIMA SAKWAT NYAANGIT KE NGAMBUNGWA

¹² Wuna mbaapma nimba, nyinangwupmba liga nimba wun kat viga ligandi wan njivwa kwuk kiyowun waa ke wangwa. Kipmamba liga nimba wun kat viga ligandi wan njivwa kwuk kiyowun waa ke wangwa. Kingi vak vapmba nima sakwat nyaangit wangweyanana nglaatndi. Kita nyan ngwuk kat wagalandeyan ndi kat awa o kai waa awa ngwula. Nima sakwat nyaangit ke wangwa. Nima sakwat nyaangit wangweyan God ngwuk kat kai waigandi.

APMA NYAN GOD KAT WAGALANDA NYAANGIT TAGULA NYAANGITNA

¹³ Ngwutna kita nya ndi kat nima vat yandeyan ndi God kat wagala kiyandi. Ngwutna kita nyan solat sindeya ndi Godna si kwutaa katsoga mbangu kwundi waigandi. ¹⁴ Ngwutna kita nyan yelokwen kat tindeyan ngwutna mbaapmana njambwi nimba kat yagwa waigandi. Yagwa wandi maa yalaa njambwi nyana si waga ndina mbangi

wel salitaa God kat wagala kiyandi. ¹⁵ God ndi kat kwunak kiyandi waa yelavika Godkat wagalanjeyan kwunak kiyandi. Wan nyan yelogwen tapman tiga kwo ligiyandi. Kavle vat yinda vak God silimbwi kiyandi. ¹⁶ Kavle vat yingwa vat nat nimba kat awat sowat ambuk ngwula. Mbukngwuk maa wutaa God kat wagala ngwula nat nimba kat tiga. Nat nimba kat tiga wagalangweyan God ndi kat kwunatndi maa apma vat kwo ligiyandi. Apma nyan God kat wagalanda nyaangit tagula nyaangitna. Wan nyaangit nima apma njivwa kwuk kiyandi. ¹⁷ Tamba la nyan Ilaija tina vla ta nyan. God kat meik kemap mila waa nimamba wandi maa meik ana ndandi. naambi kvuvuk mbak sila kita tiga meik ana ndaa lindi. ¹⁸ Tiga liga ngini God kat wandi mala meik ndandi. Ndandi maa kiginda avla waatndi.

KITA NYAN KAVLE VAT YINDEYAN NDI KAT KWUNAK NGWULA

¹⁹ Wuna mbaapma nimba, ngwutna kita nyan Godna nyaangit kwagalandeyan ndina maawut kwunak ngwula. ²⁰ Godna nyaangit kwagalalaa kavle vat ya nyan kat kwunakngweyan ndi ana kavle yigiyandi. Ndi kat kwunakngwuk maa ndina kavle vak kwagala kiyandi. Ngini nima sakwat kavle vat ana yigiyandi.

GOD WAA NYAAGIT

The New Testament in the Iatmul Language of Papua New Guinea
Nupela Testamen long tokples Iatmul long Niugini

Copyright © 1975 Bible Society of Papua New Guinea

Language: Ngepma Kwundi (Iatmul)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-12-13

PDF generated using Haiola and XeLaTeX on 14 Jun 2022 from source files dated 24 Nov 2021

b9b92e46-2e7b-584e-a145-60c7cfc1e68